

# 李白诗全集(二)

[唐]李白 著

辽宁电子图书有限责任公司

# 李白诗全集(二)

[唐]李白 著

辽宁电子图书有限责任公司

2003年3月第28版

开本:850×1168毫米 1/32 字数:150千字

ISBN L-0000-01566/ I222.742 定价:15.00 元

## 目录

|                     |     |
|---------------------|-----|
| 卷七（古近体诗五十三首） .....  | 2   |
| 卷八（古近体诗四十三首） .....  | 23  |
| 卷九（古近体诗二十四首） .....  | 54  |
| 卷十（古近体诗三十二首） .....  | 79  |
| 卷十一（古近体诗二十五首） ..... | 108 |
| 卷十二（古近体诗二十五首） ..... | 135 |

## 卷七

### 古近体诗五十三首

#### 秋浦歌十七首

##### 其一

秋浦长似秋。  
萧条使人愁。  
客愁不可度。  
行上东大楼。  
正西望长安。  
下见江水流。  
寄言向江水。  
汝意忆侬不。  
遥传一掬泪。  
为我达扬州。

##### 其二

秋浦猿夜愁。  
黄山堪白头。  
清溪非陇水。  
翻作断肠流。  
欲去不得去。  
薄游成久游。  
何年是归日。  
雨泪下孤舟。

##### 其三

秋浦锦驼鸟。  
人间天上稀。  
山鸡羞渌水。  
不敢照毛衣。

其四

两鬓入秋浦。  
一朝飒已衰。  
猿声催白发。  
长短尽成丝。

其五

秋浦多白猿。  
超腾若飞雪。  
牵引条上儿。  
饮弄水中月。

其六

愁作秋浦客。  
强看秋浦花。  
山川如剡县。  
风日似长沙。

其七

醉上山公马。  
寒歌宁戚牛。  
空吟白石烂。  
泪满黑貂裘。

其八

秋浦千重岭。  
水车岭最奇。  
天倾欲堕石。  
水拂寄生枝。

其九

江祖一片石。  
青天扫画屏。  
题诗留万古。  
绿字锦苔生。

其十

千千石楠树。  
万万女贞林。  
山山白鹭满。  
涧涧白猿吟。  
君莫向秋浦。  
猿声碎客心。

其十一

逻人横鸟道。(人一作叉)  
江祖出鱼梁。  
水急客舟疾。(舟一作行)  
山花拂面香。

其十二

水如一匹练。  
此地即平天。  
耐可乘明月。  
看花上酒船。

其十三

渌水净素月。  
月明白鹭飞。  
郎听采菱女。  
一道夜歌归。

其十四

炉火照天地。  
红星乱紫烟。

赧郎明月夜。  
歌曲动寒川。

其十五

白发三千丈。  
缘愁似个长。  
不知明镜里。  
何处得秋霜。

其十六

秋浦田舍翁。  
采鱼水中宿。  
妻子张白鹇。  
结置映深竹。

其十七

桃波一步地。(波一作陂)  
了了语声闻。  
闇与山僧别。  
低头礼白云。

当涂赵炎少府粉图山水歌

峨眉高出西极天。  
罗浮直与南溟连。  
名工绎思挥彩笔。  
驱山走海置眼前。  
满堂空翠如可扫。  
赤城霞气苍梧烟。  
洞庭潇湘意渺绵。  
三江七泽情洄沿。  
惊涛汹涌向何处。  
孤舟一去迷归年。  
征帆不动亦不旋。

飘如随风落天边。  
心摇目断兴难尽。  
几时可到三山巅。  
西峰峥嵘喷流泉。  
横石蹙水波潺湲。  
东崖合沓蔽轻雾。  
深林杂树空芊绵。  
此中冥昧失昼夜。  
隐几寂听无鸣蝉。  
长松之下列羽客。  
对坐不语南昌仙。  
南昌仙人赵夫子。  
妙年历落青云士。  
讼庭无事罗众宾。  
杳然如在丹青里。  
五色粉图安足珍。  
真仙可以全吾身。  
若待功成拂衣去。  
武陵桃花笑杀人。

### 永王东巡歌十一首

#### 其一

永王正月东出师。  
天子遥分龙虎旗。  
楼船一举风波静。  
江汉翻为雁鹜池。

#### 其二

三川北虏乱如麻。  
四海南奔似永嘉。  
但用东山谢安石。  
为君谈笑静胡沙。

#### 其三

雷鼓嘈嘈喧武昌。  
云旗猎猎过寻阳。  
秋毫不犯三吴悦。  
春日遥看五色光。

#### 其四

龙蟠虎踞帝王州。  
帝子金陵访古丘。  
春风试暖昭阳殿。  
明月还过鸂鶒楼。

#### 其五

二帝巡游俱未回。  
五陵松柏使人哀。  
诸侯不救河南地。  
更喜贤王远道来。

#### 其六

丹阳北固是吴关。  
画出楼台云水间。  
千岩烽火连沧海。  
两岸旌旗绕碧山。

#### 其七

王出三山按五湖。  
楼船跨海次陪都。  
战舰森森罗虎士。  
征帆一一引龙驹。

#### 其八

长风挂席势难回。  
海动山倾古月摧。  
君看帝子浮江日。  
何似龙骧出峡来。

其九(此首萧士斌云是伪作)

祖龙浮海不成桥。  
汉武寻阳空射蛟。  
我王楼舰轻秦汉。  
却似文皇欲渡辽。

其十

帝宠贤王入楚关。  
扫清江汉始应还。  
初从云梦开朱邸。  
更取金陵作小山。(更一作直)

其十一

试借君王玉马鞭。  
指挥戎虏坐琼筵。  
南风一扫胡尘静。  
西入长安到日边。

上皇西巡南京歌十首

其一

胡尘轻拂建章台。  
圣主西巡蜀道来。  
剑壁门高五千尺。  
石为楼阁九天开。

其二

九天开出一成都。  
万户千门入画图。  
草树云山如锦绣。  
秦川得及此间无。

其三

华阳春树号新丰。(号一作似)  
行入新都若旧宫。  
柳色未饶秦地绿。  
花光不灭上阳红。(阳一作林)

其四

谁道君王行路难。  
六龙西幸万人欢。  
地转锦江成渭水。  
天回玉垒作长安。

其五

万国同风共一时。  
锦江何谢曲江池。  
石镜更明天上月。  
後宫亲得照蛾眉。(亲一作新)

其六

濯锦清江万里流。  
云帆龙舸下扬州。  
北地虽夸上林苑。  
南京还有散花楼。

其七

锦水东流绕锦城。  
星桥北挂象天星。  
四海此中朝圣主。  
峨眉山下列仙庭。

其八

秦开蜀道置金牛。  
汉水元通星汉流。

天子一行遗圣迹。  
锦城长作帝王州。

其九

水绿天青不起尘。  
风光和暖胜三秦。  
万国烟花随玉辇。  
西来添作锦江春。

其十

剑阁重关蜀北门。  
上皇归马若云屯。  
少帝长安开紫极。  
双悬日月照乾坤。

峨眉山月歌

峨眉山月半轮秋。  
影入平羌江水流。  
夜发清溪向三峡。  
思君不见下渝州。

峨眉山月歌送蜀僧晏入中京

我在巴东三峡时。(峡一作月)  
西看明月忆峨眉。  
月出峨眉照沧海。  
与人万里长相随。  
黄鹤楼前月华白。  
此中忽见峨眉客。  
峨眉山月还送君。  
风吹西到长安陌。  
长安大道横九天。  
峨眉山月照秦川。  
黄金狮子乘高座。

白玉麈尾谈重玄。  
我似浮云滞吴越。  
君逢圣主游丹阙。  
一振高名满帝都。  
归时还弄峨眉月。

#### 赤壁歌送别

二龙争战决雌雄。  
赤壁楼船扫地空。  
烈火张天照云海。  
周瑜于此破曹公。  
君去沧江望澄碧。(望一作弄)  
鲸鲵唐突留余迹。  
一一书来报故人。  
我欲因之壮心魄。

#### 江夏行

忆昔娇小姿。  
春心亦自持。  
为言嫁夫婿。  
得免长相思。  
谁知嫁商贾。  
令人却愁苦。  
自从为夫妻。  
何曾在乡土。  
去年下扬州。  
相送黄鹤楼。  
眼看帆去远。  
心逐江水流。  
只言期一载。  
谁谓历三秋。  
使妾肠欲断。  
恨君情悠悠。  
东家西舍同时发。  
北去南来不逾月。

未知行李游何方。  
作个音书能断绝。  
适来往南浦。  
欲问西江船。  
正见当垆女。  
红妆二八年。  
一种为人妻。  
独自多悲凄。  
对镜便垂泪。  
逢人只欲啼。  
不如轻薄儿。  
旦暮长相随。  
悔作商人妇。  
青春长别离。  
如今正好同欢乐。  
君去容华谁得知。

#### 怀仙歌

一鹤东飞过沧海。  
放心散漫知何在。  
仙人浩歌望我来。  
应攀玉树长相待。  
尧舜之事不足惊。  
自余嚣嚣直可轻。  
巨鳌莫戴三山去。  
我欲蓬莱顶上行。

#### 玉真仙人词

玉真之仙人。  
时往太华峰。  
清晨鸣天鼓。  
飏歊腾双龙。  
弄电不辍手。  
行云本无踪。  
几时入少室。

王母应相逢。

清溪行(一作宣州清溪)

清溪清我心。  
水色异诸水。  
借问新安江。  
见底何如此。  
人行明镜中。  
鸟度屏风里。  
向晚猩猩啼。  
空悲远游子。

酬殷明佐见赠五云裘歌

我吟谢军诗上语。  
朔风飒飒吹飞雨。  
谢军已没青山空。  
后来继之有殷公。  
粉图珍裘五云色。  
晔如晴天散彩虹。  
文章彪炳光陆离。  
应是素娥玉女之所为。  
轻如松花落金粉。  
浓似苔锦含碧滋。  
远山积翠横海岛。  
残霞飞丹映江草。  
凝毫采掇花露容。(露一作雾)  
几年功成夺天造。  
故人赠我我不违。  
著令山水含清晖。  
顿惊谢康乐。  
诗兴生我衣。  
襟前林壑敛暝色。  
袖上云霞收夕霏。  
群仙长叹惊此物。  
千崖万岭相萦郁。

身骑白鹿行飘摇。  
手翳紫芝笑披拂。  
相如不足夸鹖鷃。  
王恭鹤氅安可方。  
瑶台雪花数千点。  
片片吹落春风香。  
为君持此凌苍苍。  
上朝三十六玉皇。  
下窥夫子不可及。  
矫首相思空断肠。

#### 临路歌

大鹏飞兮振八裔。  
中天摧兮力不济。  
余风激兮万世。  
游扶桑兮挂石袂。(石一作左)  
後人得之传此。  
仲尼亡兮谁为出涕。

#### 古意

君为女萝草。  
妾作兔丝花。  
轻条不自引。  
为逐春风斜。  
百丈托远松。  
缠绵成一家。  
谁言会面易。(会一作合)  
各在青山崖。  
女萝发馨香。  
兔丝断人肠。  
枝枝相纠结。  
叶叶竞飘扬。  
生子不知根。  
因谁共芬芳。

中巢双翡翠。  
上宿紫鸳鸯。  
若识二草心。  
海潮亦可量。

#### 山鹧鸪词

苦竹岭头秋月辉。  
苦竹南枝鹧鸪飞。  
嫁得燕山胡雁婿。  
欲衔我向雁门归。  
山鸡翟雉来相劝。  
南禽多被北禽欺。  
紫塞严霜如剑戟。  
苍梧欲巢难背违。  
我今誓死不能去。  
哀鸣惊叫泪沾衣。

（以下二首萧士斌云是伪作）

#### 历阳壮士勤将军名思齐歌并序

历阳壮士勤将军。神力出于百夫。则天太后召见。奇之。授游击将军。赐锦袍玉带。朝野荣之。后拜横南将军。大臣慕义结十友。即燕公张说馆陶公郭元振为首。余壮之。遂为诗。

太古历阳郡。  
化为洪川在。  
江山犹郁盘。  
龙虎秘光彩。  
蓄泄数千载。  
风云何湛对。  
特生勤将军。  
神力百夫倍。

#### 草书歌行